

Historia di Hospitaal



Pa: B. Bergen

Parti 4

Diasabra dia 15 di April 1972 e ponemento di e prome piedra a tuma lugar, door di e Minister di Asunto pa Antiyas Hulandes, esta ir. P.J. Lardinois.

Como e construcccion di hospitaal nobo lo dura mucho largo, directiva di Lago a dicidi y anuncia cu na fin di aña 1972, cu nan lo bay cera un parti di nan hospitaal y cu Hospitaal San Pedro, ora nan sera e hospitaal, tin cu tuma pacientnan di LAGO. Como urgente e hefe di Servicio tecnico di Hospitaal San Pedro a pinta un Unit cu lo wordo traha ariba tereno di hospitaal y a pidi vergunning na DOW pa traha e unit ariba tereno di hospitaal. Tur cos ariba peticion y cu yudanza financiero di LAGO. Dia 17 di Juli 1972 e contratista a cuminsa cu construcccion di hospitaal nobo na Eagle.

Den e mesun tempo ey hospitaal San Pedro a haya permit (Bouw-vergunning) pa traha e Unit ariba tereno di hospitaal, patras di Maria Afdeling. E unit tabata consisti di seis camber di dos persona, dos camber di un persona, un baby kamer, un kantoor y restonan di lugarnan necesario. Na cuminsamento di aña 1973 e Unit tabata cla.




Na es momento ey Hospitaal San Pedro tabata tin, tur hunto 215 cama y por a tuma e pacientnan di LAGO. Como cu e hefe di Servicio tecnico ya caba tabata cla cu inventarizacion di cua inventaris ta bay hospitaal nobo y kico mester wordo compra nobo, hospitaal a ordo cama y cashinan y mas cos nobo pa e

unit y cu despues lo wordo transporta pa hospitaal nobo.

Na fin di October 1972 e fundeshi di e hospitaal nobo tabata cla.

Fin di September 1973, a yega punto di mas haltu y esey a wordo celebra cu span-tenbier. Den un rueda di prensa lider di e proyecto a bisa cu e hospitaal por habri su portanan mas of menos na April 1975. Pero, manera ta conoci, den luna di November 1975, e persona cu tabata encarga cu e responsabilidad pa e trabaonan na e edificio, a duna di conoce cu su trabao tabata cla y el a entrega yabi di hospitaal nobo, simbolicamente, cu un atrazo di mas cu seis luna na departamento di Gobierno, esta na DOW, como doño di e edificio.

Prome cu el a biaha pa Hulanda el a bisa e hefe di DOW, cu e hospitaal no ta ful cla ainda, pa por muda. El a hala atencion di Gobierno, esta DOW, bisando cu e hefe di Servicio tecnico di hospitaal San Pedro, a inspecta e edificio pa ultimo biaha y a entrega un lista cu mas cu 100 punto di cosnan cu no tabata cla of ta faya den e edificio y pafor di e edificio cosnan cu falta. E hefe di servicio tecnico di Hospitaal San Pedro a bisa cu e planan pa muda for di Hospitaal San Pedro pa e hospitaal nobo, ta masha tempo cla caba, pero e como persona responsabel pa e edificio y funcionamiento di aparatonan den e hospitaal y ariba tereno di hospitaal, no por tuma e responsabilidad pa muda awor aki. Por ehempel pa menciona algun punto, e instalacion di airconditioning no tabata funciona bon, awa tabata leak den hall, aparatonan cu no ta funciona bon, no a tene cuenta cu bombero cu e posibilidad pa paga candela, un hoogwerker no por a subi e tereno, tampoco un truck di sushi, e rioleringsysteem no tabata funciona bon, no tabata tin borchin pa dirigi direccion y hopi mas cos, cu ta mucho cos pa menciona.



Despues di combersacion cu representantenan di Gobierno esta dienst voor economische ontwikkeling (DECO), departamento di Obra Publico (DOW), caminda nan a puntre e hefe di Servicio tecnico di Hospitaal San Pedro, si e ta dispuesto pa tuma e responsabilidad ariba dje pa dirigi e trabaonan technico pa e hospitaal por bin cla. E contesta tabata, cu si e haya tur cooperacion di Gobierno ta dispuesto pa haci e trabao ey. E hefe di DOW a laga e contratistanan, por escrito sa, cu entrante 15 April 1976, e hefe di Servicio tecnico di San Pedro Hospitaal ta maneha tur asuntonan technico na lugar di Sr. F. Fossen. E hefe di servicio tecnico di hospitaal a percursa cu mas cu 90 porciento di e fayonan grandi a ser resolvi y hospitaal tabata cla pa muda.